

“Машаққат ортида, албатта, енгиллик бор” — Шавкат Мирзиёев ИТБ саммитидаги нутқида Қуръон ва ҳадисдан иқтибослар келтирди



21:00 / 02.09.2021 2214

Тошкентда Ислом Тараққиёт Банки бошқарув кенгашининг 46-йиллик анжумани очилиш маросими бўлиб ўтмоқда. Тадбир аввалида Ўзбекистон мадҳияси янгради, сўнг Қуръон тиловат қилинди. Маросимда президент Шавкат Мирзиёев сўзга чиқди ва ўз нутқини “Бисмиллаҳир роҳманир роҳим!” дея бошлади.

Президент сўзи аввалида йиғилганларни Ўзбекистонда кўриб турганидан мамнунлигини билдирди.

“Албатта, Банкнинг йиллик анжумани Тошкентда ўтказилиши ўзига хос рамзий маънога эга. Биз буни Ўзбекистоннинг ислом дунёси

ривожига қўшган ҳиссаси, шунингдек, мамлакатда сўнги 5 йил давомида олиб борилаётган изчил ислоҳотларнинг эътирофи деб ҳисоблаймиз”, – деди Шавкат Мирзиёев.

Давлат раҳбари ўз сўзида пандемия бўлишига қарамай, анжуманни жонли равишда ўтказишга имкон бўлганини қайд этди.

“Ўзбек халқининг буюк аждоди, бутун мусулмон оламининг улуғ намояндаси имом Ал-Бухорий ҳазратлари жамлаган “Саҳиҳи Бухорий” китобида зикр этилган ҳадиси шарифда айтилганидек, “Албатта, амаллар ниятга боғлиқдир”.

Барчамиз холис ният қилган эканмиз, Яратганнинг марҳамати билан бугун Ислом Тараққиёт Банки гуруҳининг йиллик учрашувини жонли равишда ўтказишга муваффақ бўляпмиз.

Таъкидлаш жоизки, мазкур тадбир пандемия бошлангандан бери дунёдаги халқаро молиявий институтлар орасида биринчи бўлиб ташкил этилган нуфузли анжумандир”, – дея таъкидлади президент.

Шавкат Мирзиёев Ислом Тараққиёт Банкнинг янги президенти этиб сайланган Сулаймон Ал-Жассирни қутлади.

“Менга берилган ушбу қулай имкониятдан фойдаланиб, Ислом Тараққиёт Банкнинг барча аъзо давлатлари вакиллари номидан ҳурматли биродаримиз – Ал-Жассир жанобларини банк президенти лавозимида иш бошлагани билан муборакбод этаман.

Муҳтарам Ал-Жассир жаноблари! Бу юксак лавозимдаги фаолиятингизни Ўзбекистонга ташрифдан бошлаётганингиз чуқур рамзий маънога эга. Шу сабабли юртимиз билан ҳамкорлик Сизнинг масъулиятли ва шарафли фаолиятингизнинг муҳим қисмига айланади, деб ишонаман.

Мамлакатимиз тимсолида Сиз яқин ҳамкор ва садоқатли дўст топдингиз, десам, муболаға бўлмайди. Зиммангиздаги эзгу вазифани адо этишда Аллоҳ таоло Сизни ҳамиша қўлласин!” – деди Ўзбекистон президенти.

Давлат раҳбари ўз нутқида коронавирус пандемиясига тўхталиб, уни нафақат катта синов, балки ҳамкорликни чуқурлаштириш учун имконият сифат кўриш зарурлигини қайд этди.

“Бугун, инсоният катта синовларни бошидан кечираётган бир вақтда, давлатларимиз коронавирус пандемиясининг иқтисодий ва ижтимоий оқибатларини енгиб ўтиш бўйича таъсирчан чоралар кўриш зарурлигини ҳаётнинг ўзи тақозо этмоқда. Ковид пандемияси биз фақат узвий ҳамкорлик ва ўзаро кўмаклашиш орқали замонавий муаммоларга қарши тура олишимиз мумкинлигини кўрсатди.

Дарҳақиқат, Қуръони Каримнинг “Шарҳ” сурасида айтилганидек: “Машаққат ортида, албатта, енгиллик бордир”.

Яъни, жаҳон миқёсида ҳануз давом этаётган пандемия - бу нафақат катта синов, балки ҳамкорлигимизни янги босқичга олиб чиқишга шароит яратадиган имконият сифатида қабул қилиниши лозим”, - деди Шавкат Мирзиёев.

Манба:Kun.uz